

# Powšitkowne WOZJEWJENJA

njedźelu, 14. awgusta 2011

## Boža mša na Marije donjebjeswzaća w Róžeńće

W Róžeńčanskej swjatnicy budže na swjedženju Marije donjebjeswzaća, póndźelu, 15. awgusta, w 9 hodź. swjedženska Boža mša. Wšitcy su wutrobnje přeprašeni.

## Zelowy swjedzeń w Klóštrje

W klóšterskej zahrodze w Pančicach-Kukowje je njedźelu, 21. awgusta, tradicionelny zelowy swjedzeń. Ekumeniski nyšpor, na kotrymž so zelowe kwěćele požohnuja, změjetaj Drježdžansko-Mišnjanski biskop Joachim Reinelt a superintendent na wuměniku Friedhard Vogel w 14.30 hodź. Nyšporej přizamknje so koncert serbskeje dujerskeje kapały Horjany a gospeloweho chóra z Großröhrsdorfa. Tež zelowe wiki so přewjedu.

## Z Drježdžan do Mnichowa kolesować

Putnikowanje 25plus z kolesami budže wot pjatka do pjatka, 9. do 16. septembra, a powjedže po slědach zbóžneho Alojsa Andrickeho, Dietricha Bonhoeffera a Maxa Josefa Metzgera z Drježdžan do Mnichowa. Z izomatu, spanskim měchom, kolesom a přewodnym awtom podadza so zajimcy na putnikowanje, na kotrymž chcedza so ze zmužitoscju a woporom wšelakich ludži zaběrać. Wšědnje pojedu 60 do 100 kilometrow. Referenća po puću budu Christoph Baumgarten, Klaus Tilly a Guido Erbrich. Zajimcy njech so přizjewja hač do soboty, 20. awgusta, w Roncallijowym domje, Max-Josef-Metzger-Str. 12/13, 39104 Magdeburg.

## Serbski swjedzeń we Wuježku

Serbske ewangelske towarstwo přeprašuje sobotu, 27. awgusta, na dworowy swjedzeń ze swójbny m pućowanjom do Wuježka pod Čornobohom. W 13 hodź. je zetkanje pola Krygarjec we Wuježku, čisło 31A. Wottam póndže pěši na Koporčansku horu – w krutych črijach a dołhich cholowach. Po nawróće do Wuježka poskići so swačina. W 17 hodź. budže nutnosć ze superintendentom Janom Malinkom. Skupina Wólbernosće poskići we 18 hodź. swój program. Přizamknje so wječer. Štóz chce něšto k bifejej přinošować abo dwór sobu přihotować, njech so prošu přizjewi, telefonowe čisło (03 59 39) 8 05 02.

*Mato Krygař*

## Lětni koncert w Radworju

Swój tradicionelny lětni koncert před Starej cyrkwičku w Radworju wuhotuje chór Meja njedźelu, 28. awgusta. Pod hesłom „Hdžež so spěwa, so tež směwa“ su sej lětsa přeprašyli skupinu Po štyrjoch a muža z delanskich kónčin, kotryž zamóže młódsich kaž staršich přihladowarjow ze swojimi tryskami zahorjeć. Wot 15 hodź. poskići so kofej a samopječeny tykanc. Koncert zahaji so w 16 hodź. Wšitcy zbliska a zdaloka su wutrobnje přeprašeni, wosebje tež swójbny z džěćimi.